

A Espirituhanong Gasa:

❖ Daghan Gasa , Usa ang Tighatag.

- Kinsa ang naghatag sa Espirituhanong Gasa? (1 Cor. 12:4-6)

1 Cor. 12:4	Adunay Panagkalahi	Mga Gasa	Apan Mao Ra	Espiritu
1 Cor.12:5		Mga Ministeryo		Ginoo
1 Cor.12:6		Mga Buhat		Dios

- Aron masabtan nato ang relasyon tali sa espirituhanong mga gasa ug sa Naghatag niini, gigamit ni Pablo ang tulo ka mga pulong aron ihulagway kini: mga gasa, mga ministeryo (pag-alagad), ug mga pagpamuhat o buhat, nga nagpakita sa ilang nagkalain-laing katuyoan.
- Apan usa ra ang Naghatag: ang Espiritu Santo, ang Ginoong Jesus, ug ang Dios Amahan. Sa laing pagkasulti, ang tibuok Pagka-Dios nagabuhat nga nagkahiusa sa paghatag sa espirituhanong mga gasa (Juan 14:16).
- Ang Dios dili naghatag sa mga gasa sama sa paagi sa mga "dios" sa Grego ug Romano (1 Corinto 12:2). Wala'y sobrang ekstasis o pagkawala sa pagpugong sa kaugalingon, ug wala usab Siyay pinili nga espesyal nga grupo lamang (sama sa mga babayeng pari) aron makadawat sa mga gasa.
- Ngano nga ang Dios naghatag ug nagkalain-laing mga gasa sa nagkalain-laing mga tawo? (1 Corinto 12:7)
- Ang espirituhanong mga gasa gihatag "alang sa kaayohan sa tanan" o sa iglesia. Ang Dios lamang ang nasayod kung kinsa ang angay makadawat sa usa ka piho nga gasa aron matuman ang Iyang katuyoan. Ang matag gasa adunay papel sa pagpalig-on sa iglesia ug pagpasidungog sa Dios..

❖ Daghang mga Miyembro, Usa Ra ka Lawas.

- Ang Dios usa ra, apan ang matag Persona sa Pagka-Dios adunay kaugalingong buluhaton. Sa samang paagi, ang iglesia usa ra, apan ang matag miyembro adunay kaugalingong tahas isip kabahin sa lawas ni Cristo dinhi sa kalibotan (1 Corinto 12:12–13).
- Gigamit ni Pablo ang lawas sa tawo isip pananglitan sa iglesia aron ipakita ang panaghiusa taliwala sa kalain-lain. Ang mata adunay gasa sa pagtan-aw, apan ang dalunggan dili. Bisan pa niana, ang duha nagtinabangay aron ang tibuok lawas molihok sa husto. Sa samang paagi, sa iglesia, ang matag magtutuo nag-alagad sumala sa espirituhanong gasa nga iyang nadawat (1 Corinto 12:28–30).
- Kini nagpasabot nga ang matag miyembro importante. Walay usa nga mas labaw kaysa uban; ang matag usa kinahanglan mag-atiman sa kaayohan sa iyang isigka-magtutuo, ug ang tanan kinahanglan maningkamot alang sa panaghiusa sa iglesia (1 Corinto 12:15–27).

B Ang Naghiusa nga Elemento:

❖ Ang Kahalangdon sa Gugma.

- Ang gugma dili usa ka espirituhanong gasa, kondili "ang labing halangdong dalan" (1 Corinto 12:31). Kini mao ang bunga sa Espiritu Santo sa kinabuhi sa magtutuo (Galacia 5:22). Ang espirituhanong mga gasa magamit lamang sa husto nga paagi kon kini giubanan sa gugma.
- Ang gasa sa pagsulti sa nagkalain-laing pinulongan, kon walay gugma, sama lamang sa nagabagting nga agong o nagakusog nga simbalo. Ang gasa sa pagpanagna, kahibalo, ug pagtuo, kon walay gugma, walay kapuslanan. Bisan pa ang pagkamanggihatagon ug ang paghalad sa kaugalingong kinabuhi (pagkamartir), kon walay gugma, walay bili (1 Corinto 13:1–3).

C Espesyal nga mga Gasa:

❖ Ang Gasa sa Pagsulti sa Nagkalain-laing Pinulongan.

- Ang pagpasiugda ni Pablo sa gasa sa pinulongan ug sa husto nga paggamit niini nagpakita nga kini gisayop ug gigamit sa dili angay nga paagi sa pipila ka mga miyembro sa iglesia sa Corinto, nga maoy hinungdan sa kagubot ug kalibog sa pagsimba (1 Corinto 14:23).
- Ang gasa sa pinulongan mao ang abilidad sa pagsulti sa tawhanon o langitnong mga pinulongan nga wala mahibaloi sa nagsulti (1 Corinto 13:1). Kon ang maong pinulongan wala masabti sa mga namati, kinahanglan adunay maghubad aron ang mensahe makasabut ang tanan (Buhat 2:8; 1 Corinto 14:2, 13–14, 27–28).
- Ang tinguha ni Pablo nga ang tanan makasulti sa nagkalain-laing pinulongan gisayop ug pagsabot sa uban nga daw kinahanglan ang tanan makabaton niini nga gasa (1 Corinto 14:5).
- Sa tinuod, ang iyang tinguha naglangkob sa tanang espirituhanong mga gasa (1 Corinto 14:1). Giklaro na ni Pablo nga "ang pagpadayag sa Espiritu gihatag sa matag usa alang sa kaayohan sa tanan" (1 Corinto 12:7). Busa, dili ang tanan makadawat sa parehas nga mga gasa.

❖ Ang Gasa sa Pagpanagna.

- Dili nato angay limitahan ang gasa sa pagpanagna sa pagtagna lamang sa umaabot. Ang pangunang katuyoan niini mao ang pagpalig-on sa pagtuo, pagdasig, ug paghatag ug kahupayan (1 Corinto 14:3).
- Gihatagan ni Pablo ug dakong bili ang gasa sa pagpanagna (1 Corinto 14:1, 4, 22–25). Apan iyang gipasiugda nga kinahanglan kini gamiton sa husto ug hapsay nga paagi, aron walay kagubot sa iglesia: "Apan ang tanang

butang kinahanglan buhaton sa hapsay ug maayong kahusay." (1 Corinto 14:40; tan-awa usab ang 1 Corinto 14:29–33).

- Isip usa ka ilhanan nga gasa sa salin nga iglesia (remnant church), kini adunay espesyal nga pagpakita sa kinabuhi ug ministeryo ni Ellen G. White (Pinadayag 12:17; 19:10).
- Giunsa nato pag-ila ang tinuod nga propeta?
 - (1) Ang iyang mga gitagna nga umaabot nga mga panghitabo—kon dili kini kondisyonal—kinahanglan matuman. (Deuteronomio 18:22; Jeremias 28:8–9; Jonas 4:2)
 - (2) Ang iyang mensahe kinahanglan mahiuyon sa mensahe sa mga naunang propeta ug sa Pulong sa Dios. (Deuteronomio 13:1–3; Isaias 8:20)
 - (3) Kinahanglan magpamatuod siya nga si Jesu-Cristo mianhi diha sa unod. (1 Juan 4:1–3)
 - (4) Ang iyang kinabuhi kinahanglan mahiuyon sa mensaheng biblikal nga iyang ginawali. (Mateo 7:15–20))